

Sekalipun kuasa besar
tidak menghiraukan

Negara Berkecuali tetap pertubuhan penting— PM

KUALA LUMPUR 12 Sept. —Datuk Sri Dr. Mahathir Mohamad. tetap menganggap Pergerakan Negara - Negara Berkecuali sebuah pertubuhan yang penting sekalipun suaranya tidak begitu dihirsukan oleh kuasa - kuasa besar dan negara - negara maju.

Perdana Menteri berkata, pertubuhan itu antara lain dapat menjadi arena negara - negara miskin dan sedang membangun menjalankan usaha untuk saling membantu bagi memajukan diri.

Beliau menyatakan demikian dalam sidang akhbar di Lapangan Terbang Antarabangsa Subang dekat sini sekembalinya dari menghadiri Sidang Kuncupak Negara - Negara Berkecuali di Belgrade, Yugoslavia selama empat hari.

Memetik ucapan Presiden Tanzania, Julius Nyerere di sidang berkenaan, Perdana Menteri berkata negara - negara miskin dan sedang membangun perlu menjalankan usaha sendiri untuk memajukan diri sendiri tanpa bergantung kepada sesiapa.

“Jika kita mengharapkan orang lain kita pasti akan menghadapi kekecewaan,” katanya.

Datuk Sri Dr. Mahathir membayangkan rasa kecewanya terhadap sikap kuasa - kuasa besar dan negara - negara maju yang tidak begitu menghiraukan suara Pergerakan Negara Berkecuali sebaliknya lebih menumpukan perhatian kepada hal - hal untuk memburukkan imej setengah - setengah pemimpin pertubuhan itu.

Perdana Menteri yang diberi penghormat-

an sebagai pemimpin ketiga berucap di majlis pembukaan sidang pertubuhan yang dianggotai oleh 102 negara itu berkata, bagi Malaysia apayang penting ialah beliau telah dapat menegaskan pandangan negara mengenai berbagai isu.

Datuk Sri Dr. Mahathir berkata, Malaysia tegas berpendapat bahawa negara - negara miskin yang menghadapi beban hutang harus dibebaskan dari tanggungan itu jika tidak mereka akan menjadi negara mufliis.

Katanya, sekalipun berpandangan begitu, Malaysia tetap akan menjelaskan hutang - hutang luarnya kerana mampu membayarnya.

Menurut Perdana Menteri sepanjang sidang berkenaan beliau telah mengadakan rundingan dua hala dengan beberapa orang pemimpin Negara Berkecuali termasuk Yugoslavia.

Katanya, dalam perjalanan pulang beliau telah singgah di Pulau Crete di Lautan Mediterranean untuk meninjau kemudahan - kemudahan pelancongan di pulau peranginan itu.

Datuk Sri Dr. Mahathir berkata Pulau Crete yang dilawati oleh 2.5 juta pelancong setiap tahun itu mempunyai beberapa kemudahan pelancongan yang boleh dicontohi untuk memajukan bidang pelancongan di pulau - pulau Malaysia.

“Saya isi buku notasaya dengan berbagai pemerhatian yang boleh digunakan untuk memajukan pulau - pulau Malaysia,” katanya.